

2018

MIZO

(Modern Indian Language)

Full Marks : 100

Pass Marks : 33

Time: Three hours

Figures in the right hand margin indicate full marks.

UNIT – I (Prose)

25 Marks

1. Hmanlai piputen Ramhuai an ngaihnan kan zirlaibua lo lang kha han sawi teh. 6
2. Kan pipute nupui pasal chungchanga an fimkhur dan leh thlahtu bul thlenga an inchhuina chhan kha han sawi teh. 4
3. Puithiam chi hnih hmingte kha han sawi teh. 2
4. Pawla'n sairawkherha a sai thinte kha tute nge ? 2
5. Fano dawi hi eng inthawina nge ? Eng ran nge an talh thin ? 2
6. Lallula Sailo thihna hmun leh thih kum kha han sawi teh. 2
7. Lalawithangpa khan kum eng zat a nihin nge nupui a neih ? Tu nge a nupui ? 2
8. Lasi-te khan an tlangval duhzawngte kha eng tiangin nge an thlem thin ? 2
9. 'Khua leh chawm' kha eng inthawina nge ? Ti nge 'Bawlhlo tam' an tih ? 2
10. HIV pai leh pai loh test-na hrang hrang pali zingah khan pakhat han sawi teh. 1

P.T.O.

UNIT – II (Poetry)

20 Marks

11. Rokunga'n nausen, mahni pianna nuten an thihsante dinhmun a tarlan dan kha sawi la, vantlang mipui-te hnena a thil ngensak kha tarlang tel bawk ang ce. 6
12. A hnuaia hla thu tarlan hia chepa kai atanga chhuiin han hrialhfiah teh. 5
- “Mihring ka nih hma pawhin lalpa Isu
Thisena man dang beisei lova min tlan.
Chhiar sengin han hre thiam teh reng ila aw,
Khawvel zaia tikhat turin ka bei ang.”
13. Z.D. Chhuana'n 'Chinlai relthang ka dawn zo lo.' A tihna chhan kha eng nge? 2
14. 'Zun phur thing tin par' tih hla phuahtuin chungleng savate nen thil tih ho a duh kha eng nge? 2
15. Lalzuithanga khan a ngaihawng kha eng ang pangpar-te nen nge a tehkhin? 2
16. Thlarau khawvela rimawite leh van tawngte'n an puan sen loh kha eng nge? 2
17. John Henry Newman-a'n 'Hetiang ka duhin ka tawngtai ngai lo' a tih kha eng nge? 1

UNIT – III (Reading)

20 Marks

18. He thu hi ngun takin chhiar la, a hnuaia zawhnate hi chhang ang che:
Chakmaho hi awmna nei mumal lo “nomadic tribe” anga rei tak an khawsak avangin an tobul Chiang taka chhui a harsa hle. Mizo chuan “Takam” tiin an ko thin a.

Mongolian thlah zingah Tibeto-Burman peng khat an nih ring an awm laiin thenkhat erawh chuan Tai-shan emaw Mon-Khmer thlah emaw atanga lo chhuak niin an ring bawk. A then chuan China ram atanga an thlahtute hi lo thlangtla-in an pem kual hnuah Burma ram, Arakan-ah awmhmun an khuar hmasa niin an sawi. Mi thenkhat chuan Chittagong Hill Tract, Bangladesh-ah hian Bengali nen an inpawlh nasat avangin Bengali tih dan tam tak an la chhawng a; an tawng pawh Bengali nen a lo inpawlh ta nuai a ni an ti.

Helai hmun chhuahsanin thenkhat chu Mizoram, Tripura, Assam leh Arunachal-ah te an pem darh a. Arakanese-te hnen atangin 'Buddhism' hi an hmelhriat a, Chakmaho pawh 'Buddhist' sakhua zuitu an lo ni ta a ni. Arakanese history-ah chuan 1118 A.D. khan Chakmaho hi an lo lang tawh a. Arakanese hnuai-ah kum tam tak an awm hnuin Afghan lal thlazar hnuai-ah 1666 AD thleng khan an awm nia rin a ni.

Chakma *myth* pakhat-ah chuan kum zabi 18-naa Chakma lal hnuhnung ber, Sher Daulat chuan thiltihtheihna danglam tak (supernatural power) a nei a, maksak tak leh tihbaiawm takin a khawsa fo a, a sualte tlengfai turin lui-ah a inbual thin a. A ril chu a taksa atanga lachhuakin a silfai thin a. Nikhat chu a nupuiin a lo enthla kiau mai a, lal chuan a lo hre ru kar a, a thinrim chuan a nupui leh a chhungte zawng zawng chu a that chimit ta vek a. Mipui thinrim chuan an lalpa nunrawna hi ngaidam thei lovin amah pawh hi an that ve ta nghe nghe a ni. Thil rapthlak dang an chungah lo thleng tur pumpelh tumin mipuiho chuan Arakan chhuahsanin Chittagong Hills-ah an pem ta a ni.

Chakma ṭawng hi Aryan ṭawng ṭāngā lak a ni a, Sanskrit, Prakrit, pali, leh Magadhi-te nen an ṭawng leh hawrawp a inang hle a, a ṭhen a zar pawh an inṭawm nghe nghe. G.A. Grierson Chuan *Linguistics Survey of India*- ah Chakma ṭawng hi Bengali ṭāngā lak a nih thu a sawi ve bawk. Chakma ṭawng hian Assamese leh Hindi a hnaih hle bawk a. An hawrawp hi Burmese, Ahom leh Khamti (Arunachal Pradesh) nen a inang hle a. Kum zabi 13th leh 14th vela Burma-a an awm lai khan Chakmahō hian hawrawp (Script), Kadamba Script an lo hmang tawh a, ziaka thil chhinchhiah an neih hmasak ber chu kum 1777 khan a ni.

Zawhna :

- (a) Mizovin Chakma ho hi eng tin nge kan koh? Ti nge an ṭobul chhui chhuah a harsat? 2
- (b) Chakma ho sakhuana kha eng nge? Tute hnen ṭāngin nge an hmelhriat? 2
- (c) Chakma ho hi India ram chhung khawi state-ahte nge an awm? 2
- (d) Eng tik hun lai vel ṭāng khan nge Chakma ho hian hawrawp an neih? 2
- (e) Sher Daulat-a khawsak dan ṭhin mak danglam tak kha han sawi teh. 2
- (f) Myth tih hi Mizo ṭawngin eng nge? 1
- (g) Thlangtla awmzia eng nge? 1
- (h) Ṭihbaiawm hi eng tihna nge? 1

19. He thu hi ngun takin chhiar la, a hnuaia zawhna te hi chhang ang che :

Mizoten hmanlai ṭāngā ṭlawngaihna dan ṭha kan neih hi Kum zabi 21-na thlenga hman ṭlak, Mizo nihna lantirtu, min tizahawmtu leh kan nun tinuamtu a ni. Mahse

khawtlang nun mila thlan laih dan kan siamrem anga siam rem ngai kan nei ta nual, chung zingah chuan mibo zawn hi siam rem ngai niin a lang. Hmanlai chuan a tlangpuiin, 'Kawngbo, khawmu chawi, sain a seh, tuia/thinga tla, lum hlum' tihte a ni a. An kalna a zirin a zawn dan tur leh zawnna tur awm a lang nghal thin.

Tunlaia kan bo dan ni thei chu, zu, ruihhlo, kidnap, sex, bo lui, tlan chhuah tura hren, life insurance kaihhnawih, suam leh thah, rawl bo, leiba, politics leh ro inchuh tih lamte a ni tan. Criminal case lam hawi, police leh ukilte inrawlhna tur khawtlanga zawn hi a him lo.

Tin, mibo hnu chhui/thup ngai te, zep ngaite a ni thei a. Vantlang social media-ah thup tur kan thehdarh zel si a. Police hnu chhui tur tibuai zawngin kan zawng palh thei.

Chuvangin, kan hnam dana ni sarih khawtlangin pawngpaw zawn ngawt hi thil tihchi ber a la ni reng em tih hi ngaihtuah tham a tling tawh a ni. Mi bo zawnna thuneitu hi khawtlang aiah Magistrate leh Police ni tawh zawk sela. Mi bo chu Police hnenah report ila, a case a zirin, puan darh hrih loh te, hre lo anga lan te a tul dan a zira forensic inrawlhna-te a fing zawk thei.

Tichuan, police-in, zawn dan, zawngtu, zawnna hmun rel sela. An duh hmanah an duh danin khawtlang min pui sela. Police kaihhruaina hnuaiah kan hnam danin zawng zawk ila. Tunlai dan leh kan hnam dan innak lovin kan suih nghet dawn a ni.

Zawhna :

- (a) Mi bo zawn kan kalpui dan hi siamrem a ngaih chhan kha han sawi teh. 4
- (b) Khawmu chawi hi eng tihna nge? 1
- (c) Rawl bo awmzia eng nge? 1
- (d) Kidnap hi eng tihna nge? 1

UNIT – IV (WRITING)

25 Marks

20. In Biak in (Church / Temple / Chapel) awm dan (Factual Description) thumal 80 – 100 velin han ziak teh. 5
21. In khua-ah Children park in mamawh thu in Deputy Commissioner hnenah Official letter han ziak teh. 6
22. Saikawt kawng chhiat thu “Hmasawna thar” Chanchinbu-ah lehkha thawn han ziak teh. 6
23. A hnuaia thupui thente hmang hian ‘Ka naupan lai’ tih essay han ziak teh. 8
- (a) A kamkeuna
- (b) Ka naupan laia kan khaw awm dan
- (c) Ka chhungte min en dan
- (d) Ka naupan laia ka thiante
- (e) Kan chhungkuaa thil thleng pawimawhte
- (f) Conclusion

UNIT – V (Grammar)

10 Marks

24. Chanve leh zatve danglamna han sawi teh. 2
25. Rila rah tih hi hrilhfiyah la, a tichiang turin thuchangkim siam bawh rawh. 2
26. Huanah Kel var a lut, var hi eng part of speech nge? 1

27. Tui ka hleuh thiam, 'thiam' hi eng verb nge? 1
28. Zonuni chuan ka lu a naa school ka kai thei dawn lo a ti. A ṭulna hmunah punctuation hmang rawh. 1
29. Meeting hun tur kha (Vawiin zan / Zanin) tur a ni em? Bracket chhunga mi hi a dik zawk thlangchhuak rawh. 1
30. 'A ruh langin' tih hi eng tihna nge? 1
31. A lianlian kha thlang rawh. Han ziaak dik teh. 1